

E legendario Art Lamour a muri na Bonaire dia 1 di juni ultimo

E tabata pionero den "salbabida" riba lama na Aruba

skirbi pa Juby Naar



Ayera, diahuebs, mi a bin tende cu e legendario **Art Lamour**, a muri na Bonaire na principio di luna. Un homber cu a haci hopi pa e isla aki, principalmente riba tereno turistico y cu na varios ocasion a pone su bida na peliger pa salba hende riba lama, y ta heroe awe di hopi hende, decenas di hende..

"Bo friend a muri na Bonaire...". "Esun cu tabata confiabo cu tur su cosnan y documentonan, y bo mester por tin algo di dje ainda, y carta cu hendenan a manda pa bo tocante su logronan bon y

su desilusionnan, si bo no ta tira nan afo".

Mi a keda mira **Django** poco asombra. Kende e kiermeen? y Ta despues el a bisami cu ta trata di **Art Lamour** y cu el a bin haya sa caba na un anuncio di morto.

Art Lamour hendenan tabata conoce bao di e nomber aki. Otro tabata bisa cu esaki kiermeen **"Arte di Amor"** y cu no ta su nomber sigur. Mi ta kere cu mi ta un di e poco nan riba e isla aki cu tabata sa su nomber berdadero y cu a sigui su carera riba nos isla te cu el a bay Bonaire algun aña pasa despues di a pasa mal tempo na Aruba sin cu ningun hende kier a saca man pa yude despues di un desgracia riba lama y cu el a keda cu handicapnan corporal.

Na Bonaire el a logra crea un bida nobo y segun informenan hasta tabata masha admira den e corto tempo cu el a biba riba e isla aki.

Art La Moria, cu mas bien ta **Arthur Bernard La Moria**, a nace na **Detroit, Merca dia 27 di april 1908**. Na **1964 el a yega Aruba** pa traha cu **Aruba Caribbean Hotel** como manager di **Water Sports**. El a hinca den otro un operacion di primera clase y a entrena hopi hende local den locual ta **Water Sports**, landamento y sambuyamento. E tempo ey Aruba no tabata conoce e termino di **Water Sports** manera e ta conoci awendia y **Art Lamour** tabata e pionero. El a entrena y percura cu Aruba tabata tin su prome grupo grandi di **"lifeguards"** na beachnan, sinta henter dia riba nan stoel halto vigilando lama y landadornan.

El a yega Aruba despues cu el a wordo expulsa di Jamaica tratando di drenta e isla cu un macaco di contrabando. Hunto cu su **macaco Bongo** el a yega **Corsou** unda el a dicidi di sigui pa Aruba. Den transcurso di añanan e tabata tin varios macaco, pero semper cu su moto di bida cu tabata di **"un hende, macaco"**.

E tabata responsabel di **entrena Polis di lama y Mariniernan** den tecnicanan di **landamento y salvamento di bida y sambuyamento**. E tabata e prome persona cu a organiza y entrena **"lifeguards"** na Aruba.

Den su esfuersonan pa proteha hendenan riba lama el a dedica 38 aña mas o menos pa seguridad di nos hendenan, cu tabata entre otro landadornan, piscadornan, turistanan y otronan cu tabata haci uso di lama. Den e periodo aki **su staf di Watersports a rescata of salba mas di 100 hende** y corantnan a publica di esakinan tambe den transcurso di añanan. Mayoria di nan tabata turistanan.

Art tabata e **"Ernest Hemmingway"** di Aruba y tabata tin tambe parecido di figura principal di **"The Old Man and the Sea"**.

Tempo cu **Princes Beatrix y su casa Prins Claus** a bin Aruba despues cu nan a casa, e personalmente a supervisa actividadnan di watersports di manera cu e pareha por ta proteha cu tur seguridad durante henter nan bishita. El a bira anfitrión di **Reina y Prins, diferente sheik arabe cu a bishita Aruba, miyonarionan, artistanan di cine y personalidadnan di television americano**. Nan tur tabata huespednan riba **Bon Bini**, e yate cu **Art Lamour** a cumpra di **George Camara** cual tabata e prome boto di charter pa nabega dilanti nos costa west cu turistanan.

Esaki tabata na 1969 cu el a dicidi di coge su placa gana den casino y kibra cu General Manager di **Aruba Caribbean Hotel** cu kende e tabata tin pleito constante. **E Si di un semper tabata e NO di e otro**. El a hasta wordo saca di casino.

Manera ta den gobierno, relacion di gobernantenan cu gerentenan di hotel tabata asina fuerte e tempo aya caba cu kico el a haci pa haya permiso pa esaki of esaya, e tabata wordo teni abao of nenga. Belasting a baha e dje mes ora y el a biba hasta riba su yate. E no kier a baha cabez pa gobierno ni pa ningun hende y a sigui su lucha te cu el a subi cabez riba awa atrobe.

E tabata conoci pa su bringamentonan ya cu nunca e tabata hala atrasa pa ningun hende y sigur no tabata cobarde. **Pero ta mes hendenan cu el a yuda tanto na Aruba, tabata esnan cu a kibra su bida tambe** y cu a haci cu el a bandona nos isla bay Bonaire. **E tabata sospecha hasta di lo tabata wordo busca pa wordo asesina pa su propio hendenan**. Esaki tambe ta otro storia entre e tantonan cu tin di **Art Lamour**, e homber di lama cu a pone e saludo di **Bon Bini pega na Aruba** cu e nomber cu el a duna su prome boto.

El a perde su **Bon Bini** na principio di decada 70 cu biento pisa a hisa e boto tira riba tera y mas o menos diez aña despues na 1981 e desaster aki a pasa cu su di dos boto tambe casi na mes manera y e boto a wordo tira riba tera dilanti Americana hotel y el a perde su di tres boto e mes aña ora cu esaki a zink mas o menos 5 miya pabao di Aruba y asina el a keda cu su mala suerte te dia cu por poco el a perde su braza na 1996. Su trimaran **"L'Amour's Delight - Bon Bini** tabata mes popular cu e prome **Bon Bini** cu e tabata tin.

Art Lamour tin masha hopi storia cu por conta di dje te cu 1996 cu el a trata na rescata 4 turista cu tabata na punto di wordo hedat pa un speedboat. El a scapa e turistanan pero speedboat a dal **Lamour** cu a keda seriamente herida. Por poco el a perde su man drechi. Tabata tin tres especialista cu kier a amputa su man locual el a nenga te cu el a logra scapa su man tambe.

El a wordo opera y diripiente su tratamiento a wordo para. Pa varios aña bao di dolor el a sigui biba y tabata roga gobernantenan, hospital y specialistanan pa reanuda su tratamiento. E tres specialistanan a nenga te cu el a dicidi di acerca. **Dr. Vallejo** cu a laga sa cu **hopi mas por a wordo haci pa scapa e man** y alivia e victima di e dolornan cu e ta sufri di dje. El a wordo manda **Clinica Amado na Maracaibo** unda el a opera y tabata tin mester di mas tratamiento cu **na Aruba Dr. Vallejo lo a haci** pero aki gobierno a para su tratamiento pa motibo cu e gastonan lo ta mucho halto. **El a keda biba cu dolor 24 ora 7 dia pa siman te cu el a bin perde su boto tambe y a keda den bancarota**. El a haci tur sorto di peticion pa yudanza y pa sigui cu su tratamiento. El a contribui añanan largo cu miles di dollar anualmente pa obranan caritativo, y tabata tin ademas **Imeldahof como su institucion preferi**.

Pa caridad e tabata tin su macaco **"Princess"** cu tabata **haci kenshi** y cu e tabata trata manera un humano y semper por a mira nan hunto den e **jeep cora** cu **Art Lamour** tabata core. Si no tabata e jeep tabata cu e **motocicleta blauw**, un scooter, riba cual nan tabata bay **"trabao hunto"**.

E tabata tin tambe dos **kini kini, Jerrete cu Jerry** cu e tabata tin bon entrena y por a mire ta cana of core den auto cu nan **riba su schouder** tambe.

Ora mira Art, semper e tin su **8 renchinan di oro na dede y cada un cu un diente di tribon**. **Na garganta e tabata tin su cadena cu wesonan di chucho**. **Riba cabez e tabata tin un sombre di capitan cu rand di oro y hasta e blanco di e sombre a perde color bira geel/creme**. Riba su lomba semper su macaco y si no ta su macaco bo ta mire cu su **cachonan grandi cu tabata core patras den jeep** cu ne y cu tabata cachonan masha bon entrena.

Tabata un di e cachonan aki den e desgracia grandi cu su trimaran a bula na awa, **scapa bida di yiu homber di Art Lamour, y lastra e mucha den lama trece tera**.

Art Lamour tabata un di e personahenan mas pintoresco cu por a haya na Aruba y pa hopi turista tabata un figura inolvidable cu nan a topa riba nos isla. Tin cartanan di aprecio, y elogio manda relaciona cu e personahe aki.

Na maart 1992 cu **Minister Elio Nicolaas** a otorga permiso pa su negoshi di charter y trimaran, el a expresa bon cla cu **"un di e factornan cu a tene cuenta cune pa tuma decision tabata sigur e hecho cu bo ta un di e pioneronan, si no e pionero cu a desaroya watersports na Aruba y pone cu esaki a bira un di e atraccionnan mas importante di nos turismo"**.

E pionero aki no tey mas, pero su nomber si lo keda wordo menciona y tambe tur locual el a haci pa e isla aki y sigur cerca esnan cu ta debe nan bida awe na e personahe aki. E foto aki ta di **Art Lamour** prome cu el a biaha pa Bonaire y cu e tabata falta su renchinan na su dedenan y man drechi cu a keda sin por a usa normal mas. Cu **Arthur Bernard La Moria** sosega na paz.